Breton / Brezhoneg

Richard Berengarten

Bet troet gant / translated by Rhisiart Hincks

Tro da rouz-noz

...bremañ da rouz-noz...

Roue heol, da zivoc'h livrin, louiz-aour an deiz, ennon e stokez, ma teu ma c'hroc'hen da vout sae al lagad, livenn ma c'hein da vout nervenn ar gweled, ha ma kren ma c'horf trellet gant ar poullad aour a skuilhez dreist ar mor-mañ, dreist ar gêr-mañ, ma vanan dallet.

Amañ gwechall edo renkadoù – ha hep mar emaint c'hoazh en o sav – tiez ha straedoù, d'ur gêr all, ket da homañ a zo bet treuzfurmet a-grenn ganit-te.

Bale a reomp gant ar c'hae. Bigi pesketaerien an noz a zo prest da loc'hañ, kefluskerien o fraoñval, lampoù-petrol er staon, ha holl dud ar gêr sortiet evit ar bourmenadenn, amourouzien kazel-ha-kazel, paotred yaouank o rodal, mammoù ha tadoù, bugale o tebriñ koaven-skorn, paotred kozh o sellet a-ziouzh taolioù kafeoù ar riblenn, hag ar runioù, duoc'h-duañ, o tostaat, evel loened kuñv.

Ruzell c'hwek ar serr-noz, ledet war an tuchennoù, war ar bae, da vrec'h a spin ma hini bremañ, evel dre zegouezh, evel stok ar plac'h yaouank-mañ a gerzh em c'hichen, pounner he divlez, bihan he c'hammedoù, ha hej-dihej he c'herzhed, blev du-jed adkaset war-dreñv, gouzoug mistr ha divskoaz rous-takenn gant heol an hañv, hag he daoulagad arc'hell-olivez o c'hoarzhin. Da evañ a ran, sklêrijenn lintrus, evel gwin, evel muzik, e-giz m'o deus he hendadoù da evet 'pad miliadoù a vloavezhioù.

Kêr splu, *Eleftheria* eo hec'h anv, hag evit da'z kleizennoù bezañ pikoù gris en he daoulagad, c'hoazh, d'an eur-mañ ma c'hoari ar sklêrijenn hag he diskedoù sutil war he dremm evel al lavar pe ar c'han, dezhi emañ ar gwir kozh da bourmen war ar c'hae-mañ evel benveg ha diwaller da sklêrijenn en ur zastum anezhi e puñsoù he daou vab-lagad zon, ha dezhi emañ, ar frankiz muiañ-karet, da'z pilpasañ evel korollerez.

Rouz-noz muiañ-karet, sklêrijenn miliadoù a vloavezhioù, kanerez he mouezh sklintin, ken kaer hag ar plac'h-mañ, penaos ne azeulfen ket ar gras a deuzez ar gêr-mañ hag he zud ennañ, ur moull hag a skult kement tra touchet gantañ, ar bed a-bezh?

Da sklav on deuet da vezañ, ma n'eo ket da gêriad. Ha sec'hedik, c'hoant ganin da evañ betek ar berad diwezhañ, e leugnfen pep toullig-c'hwez gant da splannder, gant he frankiz.

Richard Berengarten

Bet troet gant / translated by Rhisiart Hincks

interLitQ.org